

太倉州志卷十九 原修

人物三 古今人傳

明

王世貞字元美忬子年十九登嘉靖二十六年進士授刑部主事歷遷員外郎中奸人鬪姓者犯法匿錦衣都督陸炳家世貞搜得之炳介嚴嵩以請卒不許吏部兩擬提學皆不用用爲青州兵備副使父忬繫獄世貞解官奔赴與弟世懋日蒲伏嵩門涕泣求貸嵩陰持忬獄而時爲謾語以寬之忬竟死兄弟持喪歸蔬食三年不入內寢旣除服猶卻冠帶苴履葛巾不赴宴會幾十年

太倉州志

卷十九 人物三

一

隆慶初兄弟旣伏闕頌父寃言官薦起之世貞堅不出以八事應詔不允起大名副使遷浙江右參政山西按察使母憂歸服除補湖廣旋改廣西右布政使人爲太僕卿萬曆二年以右副都御史撫治鄖陽數條奏屯田戍守兵食事宜有姦僧僞稱樂平王次子奉高皇帝御容金牒行游天下世貞曰宗藩不得出城而譸張若此必僞也捕訊之服辜張居正枋國以世貞同年生有意引之世貞不甚親附荊州地震引京房占謂臣道太盛坤維不甯以諷居正居正婦弟辱江陵令世貞論奏不少貸居正積不能堪會遷南京大理卿爲給事中楊節

所劾卽取旨罷之後起應天府尹復被劾罷居正歿起南京刑部右侍郎不赴十三年起南京兵部右侍郎擢南京刑部尙書移疾歸卒於家世貞始與謝榛李攀龍輩結詩壇紹述李何復古之學其持論文必西漢詩必盛唐大厯以後書勿讀名出數子上顧盛推攀龍攀龍歿獨操文柄者二十年晚年攻者漸起世貞顧漸造平淡病亟時劉鳳往視見其手蘇子瞻集諷翫不置也三子長士騏字罔伯萬厯十年鄉試第一十七年成進士授兵部主事改禮部時儲位久虛有以冠婚及期請者上允行士騏爭以先冊立而後婚冠祖制不可違乃止

厯文選稽勲司郎中沈一貫當國士騏故門下士迫清議稍去就其間一貫銜之會得匿名書言傾儲事事連士騏取中旨削籍光宗立錄國本功追贈太僕寺少卿士騏字房仲工制義及古文詞世貞特奇愛之爲諸生蔭入太學會邑有海警士騏以兵曹在假鳩眾習射爲捍衛計士騏亦招聚材勇角藝於家或以招納亡命譖之當路下檄捕治旣得釋坎壈不平之氣悉寓諸詩歌識者謂有隱痛焉年三十六卒士駿字逸季諸生有才名卒年僅二十九

吳轍字希由嘉靖間以歲貢授東昌訓導丁艱服除調

茶陵茶陵去省遠知州赴省轍當攝州事辭曰吾官故冷不可使暫熱以違吾志也御史王某與轍善匿不見及薦陞綿州學正竟挂冠去

劉文玉字振之居直塘親歿廬墓中嘉靖十六年舉人授長垣知縣居官廉介復宗藩地忤豪右中蜚語挂冠歸子必達孫元奎俱諸生亦以孝稱

張俸字朝恩年十六爲童子師得尺布斗粟必奉父母自以不能具甘旨每宴會遇廣筵嗚咽不下箸父母歿俸已耄哭泣如嬰兒撫二弟推予遺產徭役悉自任數日不見卽如失俸歿有司上其行提學御史耿定向旌其門兵備道蔡國熙題墓曰孝友先生

徐爌字文華嘉靖三十二年進士授長沙府推官父憂服闋補武昌以治最徵爲四川道監察御史改山西巡視兩淮鹽課都御史希柄臣指歲增鹽課數萬爌抗疏爭卒如故額旋爲北畿提學道有大學士某屬其甥者爌曰視文何如耳竟置下等某銜之嗾科臣摭事劾爌首輔徐階謂曰吾故識爌是減兩淮鹽稅御史也尋弗問陞按察副使督江西學政值嚴嵩敗籍圖書充棟悉置之學宮遷山西行太僕寺卿致仕爌性孝爲御史時聞本生父訃哭曰吾卽爲人後奈何抱痛所生而綬仍

若若耶亟引疾歸晚好神仙卒年七十一
顧章志字行之濟子幼孤長通經術嘉靖三十二年進
士授行人使廣東絕餽遺時嚴嵩父子鬻權人爭趨章
志獨弗往改司副遷司正轉刑部郎中多平反聲名爲
西曹最禮部尙書吳山器之請調禮曹以不當嵩意弗
果移病歸嵩敗起原官出爲饒州知府饒俗好訟吏窟
穴其間紛不可理章志至召吏庭列扶其尤貪黠者餘
以次聲罪眾重足立下邑訟片語決遣待訊者不齎宿
日糧浮梁縣景德鎮姦人與安仁豪以競陶器閩嘯呼
至千人章志適至從輿中諭以禍福悉散去以治最進

湖廣按察副使乞養歸母喪服除補廣西靖江王汰所
遣使馳驛章志叱曰未奉朝廷賜何得馳驛止之民田
有與王府屯地錯者王圖并得章志持不可王慙沮進
貴州右參政又進廣西按察使以參政致仕尋薦起山
東按察使讞決益精召拜南京光祿寺卿遷應天府尹
南京兵部右侍郎故事選衛士富實者領都貢舫比上
供苦中人朘剋多破家黠者避役至虛伍不成軍章志
仿僱役法募諸篙師官爲馭之除衛士累中貴無所侵
行伍如故疏上報可未幾卒於官年六十四南都人肖
像祀之子紹芳萬曆五年進士改庶吉士官至贊善早

卒

周渤字之元錫子嘉靖二十五年舉人授益陽知縣改江陵為政廉明陞饒州府同知請告歸子履成字介甫萬曆戊子辛卯兩科副榜授清平主簿陞德清丞攝縣篆會漕弁橫裁以法當路納弁賅語侵之即口解綬歸士民為建生祠

曹灼字用晦嘉靖三十二年進士授撫州推官甫至有豪某以事誣臨川令置之法金谿人

舊志作金陵耆舊傳作金谿畬按金

谿為撫州屬縣今依正有殺從父者其戚御史某庇之灼曰吾不

為權貴撓三尺法也竟坐死擢刑部郎聲益著父憂歸

太倉州志

卷十九 人物三

五

閉門校方書曰此豈不能活人耶居鄉徒步從一平頭奴人目為田舍翁卒後囊橐蕭然年七十四

張振之字仲起少聰穎州同知周鳳岐試諸生得振之文驚喜問其父兄曰父老而貧兄名撫之適坐事繫獄鳳岐立出之父士鏗感異疾躁不能眠振之以身承得小安踰七晝夜而愈嘉靖三十八年成進士授處州推官時守入覲遂行守事首舉條鞭法詰暴橫貴要斂手秩滿會嚴嵩當國諸徵者多賄通振之不應嵩敗始就徵擢監察御史按通州糧儲衛官利掌衛印以避漕運振之疏請漕運必用掌印官度利害均官軍稱便著為

令定國公徐延德縱恣振之露章劾奪其任又論戶部
尚書高燿奸利狀嘗過錦衣衛視囚振之欲仍故事繇
中門入指揮使不聽與詰難緣是多恨者借事搆之謫
臨清州判移廣信遷撫州同知撫多盜振之籍捕卒令
日一人直盜發罪直者亡何獲其魁斃之獄盜衰止署
崇仁縣事入爲南京兵部員外郎遷南吏部郎中出知
吉安府府與廣信撫州鄰壤振之久歷土風治行益精
敏吉水知縣暴戾欲去之縣有所恃不能勝憤恚乞休
未報歸事聞奪官居久之起知杭州尋晉按察副使備
兵溫處病歸卒年五十七振之服官二十年食不能具

肉罷吉安歸橐中不滿二金見盥具爲署中物投之水
性好義吉安丞張大猷卒婦妬妾生子流落民家爲置
保姆以歸於張長甯令沈某盡室死爲治喪具以孤孫
託有司天台令死於官女孫入伎家亦贖以還之其外
家有仇嘗侵振之後道見桎一婦則仇者妻以逋賦囚
於官爲代償得釋居常念受知周倅歲時寓書幣亡絕
孫峽字九服有文學以鄉舉終

王世懋字敬美忬次子嘉靖三十八年成進士未幾遭
父難隆慶初從兄白父寃二年以薦授南京禮部主事
擢員外郎母憂服除補郎中遷尚寶司丞時臺臣傅應

楨劉臺論張居正得罪世懋數左右之居正怒出參議江西明年進副使理驛傳改陝西提學副使請告歸居正卒起浙江提學辭再起福建晉布政司參政擢南京太常寺少卿萬曆十五年病歸卒年五十三世懋文名亞於兄立身嚴正在南京禮部時魏國公有兩度子長邦瑞弗愛愛邦甯欲立之時邦甯母鄭氏已冒封而邦瑞循例襲封當先入國學或說祭酒返其牒尙書林某無以難也世懋奮筆爲移文言鄭氏未受封生邦甯則均度度均立長有國法在遂卒嗣邦瑞署江西按察使南昌令用苛察當上官意世懋盡發其姦聞者快之嘗閱訊牒一字異前讞呼取較之果舞文窮治抵罪臨歿遺兄書云願廟堂勿固寵勿近小人勿聽讒搜人過諸君勿偏見勿立黨勿私報復語不及私子士騷字閑仲萬曆二十二年舉人亦有文名

王錫爵字元馭嘉靖四十一年會試第一廷試第二授編修累遷至祭酒萬曆五年晉詹事張居正奪情吳中行趙用賢等疏詆之居正怒錫爵邀同館十餘人詣居正求解不納錫爵獨造喪次切言之居正徑入不顧中行等既受杖錫爵持之大慟復祖郊外明年進禮部右侍郎居正甫歸治喪九卿急請召還錫爵獨不署名旋

乞省親去居正歿捕擊者眾錫爵獨寓書當事言江陵相業亦可觀宜少護以存國體十二年冬卽家拜禮部尙書兼文淵閣大學士參機務還朝請禁諂諛抑奔競戒虛浮節侈靡闢橫議簡工作帝咸褒納時羣臣請建儲者眾帝皆不聽錫爵疏請勤御朝講日親大臣時披閱章疏而早定根本之計温旨報聞十八年元日帝御毓德宮召輔臣入手握皇長子令就視輔臣趨拜已命皇三子出輔臣擬拜如前帝力止曰不可旋出雒于仁疏欲實罪目屬錫爵錫爵因言于仁誠有罪第實以重典恐天下不知于仁訕上直謂陛下拒諫帝意解因以

册立豫教請復屢疏上帝手諭倫序已定朕何敢私特以皇長子羸弱待十年後大典竝行錫爵因語人曰聖意無他第不欲發自臣下吾屬當靜聽十九年夏請歸省母二十一年正月還朝爲首輔先是有旨是年春舉册立大典錫爵密請帝決大計帝遣內侍以手詔示錫爵欲待適子令元子與兩弟且竝封爲王錫爵奉詔擬諭旨而又言漢明帝馬后唐明皇王后宋真宗劉后皆養諸妃子爲子請令皇后撫育元子則元子卽適子而生母不必崇位號以上壓皇貴妃亦擬諭以進帝竟以前諭下禮官令卽具儀於是舉朝大譁羣詣錫爵第力

爭廷臣諫者章日數上錫爵力請追還前詔帝不從請下廷議不許請面對不報乃自劾三悞乞罷斥帝亦迫公議追寢前命七月彗星見錫爵疏言彗星漸近紫微惟建儲一事可以禳之報聞仍持首春待期之說十一月皇太后生辰帝御門受賀畢獨召錫爵勞之曰卿扶母來京誠忠孝兩全錫爵叩頭對曰臣今日正恐忠孝兩虧因力請早定國本帝曰中宮有出奈何對曰此說在十年前猶可今元子已十三尙何待況自古至今豈有子弟十三歲猶不讀書者帝頗感動錫爵退復上疏力請遂有出閣之命明年二月出閣禮成輔臣侍班詞

臣六人侍講讀俱如東宮儀中外爲慰錫爵在閣時嘗力止礦議罷江南織造江西陶器減雲南貢金出內帑振河南饑帝皆無忤眷禮逾前後諸輔臣其救李沂力爭不宜用廷杖尤爲世所稱特以阿竝封指又郎中趙南星斥侍郎趙用賢放歸論救者咸遭譴責眾指錫爵爲之雖連章自明且申救人卒莫能諒也錫爵遂引疾乞休疏八上乃允比行以懲忿怒躬廟饗等十二事進規歸七年東宮建遣官賜勅存問三十五年廷推閣臣帝旣用于慎行葉向高李廷機還念錫爵特加少保遣官召之三辭不允時言官方厲鋒氣錫爵進密揭條數

事而南省訶得之撫爲罪又追論前竝封事攻者益譁
上眷愈厚錫爵竟不出又三年卒於家年七十七贈太
保謚文肅賜葬長洲縣楓橋之鳳凰墩勅建專祠天啓
初加贈太傅

沈默字識道嘉靖三十一年舉人任魯山縣俗崇釋教
多奸慝默示勸還俗禁子女入空門民風爲之一變
龔起鳳字瑞周始冒周姓名江嘉靖三十七年舉人復
姓名授定州學正時知州由中朝左遷諷起鳳拜持不
可曰無兩失也應聘典中州試數與御史爭尋擢大理
寺司務寺胥例納免役錢正卿王篆屬起鳳徵不應篆

怒答其役起鳳亦答篆役被劾謫嚴州學正遷知杞縣
縣見囚三百人多冤濫悉縱去留十二人歸德府李某
殺人賄令脫死上官移起鳳訊未至二十里令欵迎惟
謹至則私致千金起鳳叱退窮治伏罪縣故有馬價夫
價金五百起鳳以歸官曰蔬菜一簋僕不勝困皆逃歸
則日給小史銀二分具飲食御史行縣供帳儉率監司
謂曰按君嚴重奈何令坐折脚牀起鳳曰瑣事安問此
監司匿笑亡何以不及論罷縣爲罷市旣行泣送者萬
人又醵三百金請曰使君卽不念家當顧行路起鳳曰
勞苦父老我單行可無恐卻去周王以百金贖亦卻不

受曰罷吏謝王願留惠百姓既歸灌園園惟種韭里中持錢往則開園刈韭若不知爲官人時稱龔公韭如是積年乃卒卒時壻爲具棺先是壻嘗冒受金爲起鳳所惡至是張目云卽親螻蟻母污我友人張振之合錢治後事始得殯云

周鐸字子振參政在從子嘉靖四十四年進士授南京兵部主事歷員外郎中不受要津請託出知嚴州府爲政廉平中蜚語謫汾州府同知嚴州民卧轅擁泣稍遷福州府同知汾民遮留如去嚴時閩中數被倭鐸繕餘艋簡驍銳預設戰守備倭不敢入陞南京刑部郎中又

出爲漳州漳故邊海民慄悍嘯聚爲盜鐸擒治其魁四境肅然臺司以異等薦鐸竟移疾歸年八十二卒

楊士元字仁甫隆慶五年進士授裕州知州時年二十四以請罷市稅忤上謫廣東鹽課提舉不名一錢擢興國知州治盜賊正賦籍立礦禁修城郭建謝枋得祠居五年陞襄陽同知并攝府事建雙溝呂堰諸隄梁皆以俸助之尋授南京兵部員外郎乞養歸卒年四十七

趙宦光字凡夫居璜涇祖汴嘉靖十年鄉試第一十七年成進士父樞生隱士宦光少入資爲國子生豪華自喜中歲折節讀書廬居寒山親墓旁手闢荒穢疏泉架

壑儼如圖畫一時勝流爭造焉工篆隸著書數十種尤精字學說文長箋其所獨解子均字靈均有志節從父傳六書之學又從燕山僧見林授大梵字并諸字母移日分夜父子自相講習

王鼎爵字家馭錫爵弟少依兄受經堅苦自力隆慶二年成進士授刑部主事調禮部移疾歸已補主客司郎中時錫爵爲禮部侍郎引嫌改南京吏部會張居正以奪情事銜某屬南考功將黜之鼎爵請解弗得貽書錫爵曰時乎有變因有歸志尋陞河南提學副使不數月移疾歸丁外艱服闋病卒年五十鼎爵氣度和緩與人

交周篤事兄極謹然意所不可卒弗附會歷官精勤居家好施與凶歲出轎車數百他所全活者無算

王在復年二十一從父讀書城外倭寇入犯父子走入城父體肥不能速行中道相失在復走二里許展轉尋父聞被執急趨賊所叩頭求免賊不聽拔刃擬其父在復以身蔽之賊怒并殺之兩首墜地而手猶抱父不釋時嘉靖三十三年五月後請於朝得旌勒石

管志道字登之居毛家市隆慶五年進士除南京兵部主事時衛卒苦貢舶志道言於尙書裁去三百歸江濟二衛中江淮有悍卒讐一千戶聲言本兵行驅漕卒入

操練激眾伺隙起都人恐志道佯不動徐治其渠旋解
丁外艱服除改刑部張居正秉政志道上疏條九事所
陳內有欲修高皇掌故巡道與巡按抗禮居正度御史
勢重必不受遂出志道廣東僉事志道之官竟伸前議
疏入不報而御史劾果上得旨降調志道正彊盛會大
計實老疾然名益重久之以臺疏還舊官仍致仕會薦
起湖廣言者復尼之乃決歸志道初受知於督學耿定
向與羅汝芳王璧相師友講解理學晚頗涉禪說卒年
七十三曾孫正傳崇禎四年進士歷知永豐贛縣著風
節爲忌者所中以冤夭死

張啓字慧叔棄儒術習韜畧入都以布衣上保障東南
培植人心二疏不報游山東會白蓮教反募兵助勦斬
馘無算撫按欲薦授以官以母老辭歸

毛在字君明澄從曾孫萬歷二年進士授建昌府推官
禁暴戢姦豪猾屏跡丁父艱服闋補金華課最擢雲南
道御史出按貴州平牙寨苗瓮賞等之亂請廣解額建
縣治以懷遠人思南諸生蕭重望爲繼母誣繫獄論死
在覆訊得實出之又按山東歲大侵請蠲振凡五上疏
得允宗聖公曾氏裔孫流寓遠方至是歸嘉祥補博士
在特請改三氏學爲四氏學又按河南陞大理寺右丞

以疾卒於京邸生平不營家產置義田二頃以一頃贍族人餘以助貧者區役

沈昌期字廷際其先山東滕縣人萬曆十一年成進士授龍溪知縣申雪誣枉一縣稱神故事以贖鍰積穀多寡爲令殿最昌期奏記言令不能興訟致金粟御史躋之邑田負山枕海被水衝齧多失額其漲者豪右率隱占之昌期下令清丈許自實不實有罰人不敢隱科其糧以抵失額又興水利墾曠土歲得穀千石於是葺學舍新鄉賢祠文教翕然瑩獨矜寡收卹備至擢驗封司主事歷遷至文選司郎中在部五年抑絕奔競未幾陞

御史建言礦稅害謫大埔典史怡然就道旋歸里及卒家無餘資熹宗初錄礦稅註誤諸臣贈昌期太常少卿子綿應字麟系諸生以薦授辰溪知縣爲政有惠愛崇禎十五年卒官貧甚鬻書以殮遠近聞之爲罷市

江有源字進卿萬曆八年進士授南充知縣縣多興作有源出帑羨并俸錢以應民困以蘇先是熬鹽井井竭民破產殉有源閱實悉蠲之時方清丈有源精握算老猾吏搖手戒受成事而已擢南京河南道監察御史尋改北旬月間上救荒水利崇節儉請諭教三疏帝皆報可未幾卒官弟有功舉人官至彌勒州知州有功子用

世字仲行天啓二年進士授刑部主事歷員外郎中以忤璫削籍崇禎初起原官擢肅州副使尋補廣東嶺西道加參政值颶風作漂大艦數百稅之可得十餘萬緡用世禁勿上岸曰庸知非洋寇耶遷江西按察使以事被譴歸

陸起龍字震卿萬曆十一年進士授行人使外藩絕餽遺出爲黃州通判多惠政祀名宦子遜之字子敏廩生與沈縣應黃翼聖同被徵官綿州知州州多盜遜之單騎擒盜首罷官歸閣部史可法聘爲參軍可法死歸隱石牌涇口以貧困死

浦士衡字殷卿萬曆十四年進士授裕州知州裕故才藪士衡至拔其尤士益向學州公費歲額五百金裁三之一以寬民力汝南道轄十三州縣供具獨取辦於裕士衡言諸兩院因令道屬州縣均輸銀著爲令同官銜之會父病歸丁憂服闋謁選前憾者在吏部陰持謗語修隙罷歸家居三十年卒年六十八

王臨亨字止之徙居崑山萬曆十七年進士授西安知縣調海鹽就徵齷於顯者轉刑部主事再遷至郎中尋陞杭州知府未任卒臨亨性坦易辭氣溫讓顧精吏才任刑部時奉命審錄江北明年審錄廣東故事得減百

人死臨亨減踰數吏以例請臨亨云我知不枉人甯計
干咎卒減二百餘人高梁有盜珠者採珠太監以私憾
張其事論死者六十人巡按李某救之不得臨亨至一
日好語太監稱其施予急義太監喜乃及高梁盜案曰
彼死固當第亡賊死或有後言爲公惜此義聲太監謝
惟命六十人得不死雲南司兼掌都下獄緹卒多飛文
冒功臨亨每比輕律前海鹽顯者死人訟其子謀於臨
亨謝曰我不能市怨於人之孤也及卒海鹽西安兩縣
俱祀焉

黃元勳字宗甫萬曆十七年進士授慈谿知縣調平樂

擢柳州知府仕至陝西布政司參政所至有善政尤大
者在柳州不動聲色安十八司酋長之變元勳嘗自言
吾仕宦三十年所至盡職未嘗邀一名譽未嘗受一私
謁云

張輔之字爾贊本姓尤爲張振之所知改今姓萬曆十
四年進士授行人十九年擢工科給事中歷禮兵兩科
晉兵科都給事中時倭劉反西夏督臣頓兵不進輔之
疏糾之復陳方畧數事倭破朝鮮樞臣議主欵貢輔之
論止之播酋楊應龍介黔蜀間擾害尤甚輔之請特設
總督責成蕩平在兵垣前後四十餘疏凡歷三大征區

畫事宜悉中機要御史曹學程忤旨擬辟時值廷審多
署情實輔之獨會疏救得未減厯太僕太常寺卿晉工
部右侍郎務節省足國用察姦商破冒物料及胥吏濫
用稍食弊竇一清天啓三年晉南京工部尚書四年乞
休歸崇禎二年卒年八十三

錢桓字握之萬厯十七年進士授任邱知縣丁艱服闋
補藁城擢山東道御史出按畿南再按四川蜀有白孝
廉暴橫設水火二阱於家桓改裝往勘之得實糾治蜀
例繳鋪墊銀三載應得三萬八千有奇悉捐鑿義井修
棧道置鐵鏈以利往來入掌河南道陞太僕寺少卿以

僉都御史巡撫南贛目眚乞休歸又數年卒桓長者中
立無所黨任邱地衝且雜中人豪貴治以清肅稱盜劫
富民未獲富民執其讐以抵之桓疑非是釋所執購得
真盜按畿南時邯鄲井陘間大俠恣橫桓實諸法三輔
震栗四川前御史與安酋隙議削地巡撫持未決桓至
謂其地屬僭據削猶後若安故壤削且生牂牁餘種心
迺弗削安酋以故不叛蜀權酷歲約四萬中人徵督爲
厲桓同巡撫割贖緩代之民以不擾章貢水溢漂民廬
舍桓急請振報可苗蠻時豨突桓戒將吏守要害毋弛
備毋貪細功諸蠻讐服信豐令貪墨撫按庇之桓力劾

去兩關稅萬計舊隸幕府桓檄關吏簿其權貯府藏備
兵興旱潦費念蜀宗祿不給置公田以時發桓性儉日
食鮭菜一盂居鄉清謹約束子姓至今頌其盛德子炳
以明經授富陽令次子燧天啓元年副榜歷英德仁化
知縣經濟俱有父風

王在晉字明初早失父受書於兄在恒母病痿身自抱
持者累年萬曆二十年成進士授中書舍人轉工部主
事陞福建興泉道平海寇有功母憂服闋補湖廣荆南
道水災括贖緩振濟全活無算改副使湖廣學道轉杭
嚴道勦平劇賊免民船僱運遷江西左布政時景德鎮

窑化一瓷牀極精巧守土者擬入貢在晉命舁之至立
碎之眾大駭在晉曰此偶爾幻化非人工今入貢異時
再徵何以應且非常之物近怪不毀何爲眾乃服擢都
察院副都御史巡撫山東陞工部左侍郎總督河道卽
授添設兵部左侍郎總理戶兵工三部遼民渡海聚登
萊請金十萬并發山東所積穀振之水西藺酋反舉朱
燮元等征勦蜀遂平天啓二年特授兵部尙書賜蟒玉
尙方劍代熊廷弼經畧薊遼等處已召還爲南兵部尙
書轉吏部崇禎初歷刑兵兩部尙書以失察罷歸十六
年卒年八十

施德政字正之萬曆十七年武進士歷陞浙閩都督平倭有功勩逐紅夷閩人德之遷神機營右副將復掛大同總兵印未任卒

王衡字辰玉錫爵子讀書五行俱下錫爵忤張居正衡時年十三和歸去來辭以寄錫爵歎曰不去將爲孺子笑遂卽日歸錫爵後柄用萬曆十六年衡舉順天鄉試第一郎官高桂饒伸疏論有私詔會午門外復校衡通敏人皆歎服伸猶疏不已上怒譴伸衡請錫爵疏救人更以此多之錫爵歸二十九年會試成進士廷試第二如其父授編修是歲奉使江南因請終養歸三十七年

太倉州志

卷十九 人物三

十九

病瘍卒年四十九衡詩文俱名家尤長經世畧注意邊務論者多惜其未用

王元爵字尊馭錫爵從弟父夢臣有隱德萬曆年間錫爵被存問命元爵齋奏入謝授中書舍人擢侍經筵冊封慶藩充副使捧光宗登極詔所至絕饋遺居家留心水利議濬婁江諸幹河桑梓賴焉

王遇賓字叔元父文澗有兄年老爲人所訟吏捕之急文澗負兄代辯知州呵責甚厲文澗伏地請曰兄年老受刑必死某壯願代守義而釋之遇賓幼攻苦讀書受易於歸有光萬曆三十二年成進士授青縣知縣邑大

饑設糜施振部署井然調河間邑有馬戶出資養馬斃則買償當之者困遇賓請以公帑市而盡除其籍地多中貴莊宅一切裁以法治五載巡按薦牘二十四上行取至京補大理寺正四遷至刑部郎中出知渝州府白蓮妖眾屯結境內縛其魁投之江支黨解散秩滿陞按察副使備兵川南四十六年藺州安酋與黔地奢酋共作亂臺檄遇賓往諭安酋受命引退復受檄勘訊黔蜀將吏受安酋賂多所隱匿遇賓據實以聞勘案遂定尋乞歸卒年七十六當遇賓勘事畢適遼左軍興奢崇明子寅請率一旅自效遇賓力止之曰此酋包藏禍心令

借勤王名奮袒疾呼全蜀危矣後調兵檄至奢酋捲甲趨渝遂叛人服其先見云

陸獻明字君謨萬曆三十五年進士除嘉興知縣以廉能第一入爲御史巡按貴州時水西酋安邦彥叛甫入境而撫臣王三善之師覆沒獻明馳援徵調川湖兵防隘轉餉無乏黔中藉以無恐再按湖廣僚屬請建魏奄生祠獻明裂其牘楊漣瘐死詔獄捏贓三萬行撫按嚴追獻明捐俸及贖緩代完之適黔事壞巡按傅宗龍丁艱內批復命獻明按黔加太僕少卿監軍務獻明聞命就道疏言欲破水西當用重兵三方竝進後卒用其言

復所失地安酋平轉正卿思宗登極上疏謂新政必以勤學用人爲先因薦文震孟陳子壯顧錫疇李繼貞等皆先後擢用使竣還京又上疏請裁節驛站諸事皆切要尋以失儀被糾致仕歸林居十年卒年八十一子日升崇禎十五年舉人終父喪悒鬱死

王志堅字淑士臨亨子萬曆三十八年進士授南兵部主事南曹故閒暇要同舍郎爲讀史社商畧前代行事又假焦竑藏書繕閱無少懈秩滿陞僉事提學貴州以養親辭薦起浙江水利僉事念迎養便就官時議毀德勝諸壩令估艇直達會城志堅謂壩毀則湖涸蓄泄亡

恃將水旱均病乃止會餉急溫州推官創票鹽法商大困志堅又力陳非是乃已母憂去起湖廣驛傳道清黃州九驛馬價驛得亡累隨遷其省提學道拔寒峻名試文錄曰昭質未終任而卒年五十八志堅恂恂蘊藉負狷性門無雜賓坐起一小樓讀書最有法經先箋疏後辨論史先證據後發明爲世所稱嘗戒子弟曰願汝曹爲學究弊不過迂文人所流恐破方爲圓猶弗止也徐鳴皋字環中幼爲張振之所知弱冠中萬曆二十二年舉人謁顧憲成叩程門宗旨後爲青陽教諭訓諸生曰恒言必祝人科第我則願諸生爲聖賢科第由天聖

賢由我諸生服其教遷南京國子監博士陞江西臨安同知有治績以疾去官鳴皋內行敦篤其學與東林稱同道然不欲緣之標榜家貧至不能具朝餼不介意默坐一室編摩論列著述甚多臨歿授門人郎星緯星緯死於兵書遂亡

曹繩武字昭復隆慶四年舉人會試下第盡以行篋所有畀友朋之謁選及歸者里人顧成忠卒於都爲治殮護槨歸又爲葬其祖父同學周某歿教其子力學成名毛某妻守節爲建坊其好義類此

李繼貞字散尹萬曆四十一年進士除大名推官歷遷

兵部職方主事天啓四年典試山東坐試錄刺魏忠賢削籍崇禎元年起補武選司員外郎進職方郎中尙書熊明遇深倚之孔有德反山東明遇主撫繼貞疏陳不可且請調關外兵入勦明遇不能從後訖用其言滅賊初延綏盜起繼貞請如神廟故事遣御史齎米三十萬石以往安輯饑民以孤賊勢帝遣御史吳甦以十萬金往繼貞少之帝不聽賊果日熾大學士周延儒繼貞同年生屬總兵官於繼貞繼貞瞠目謝曰我不奉命必獲罪刑部獄甚寬可容繼貞也延儒銜之田貴妃父宏遇以坐門功求優叙不獲中官曹化淳欲用私人爲把總

言於尚書張鳳翼以命繼貞繼貞亦不可化溘怒與宏
遇日伺隙讒之帝貶三秩會繼貞請起用巡撫梅之煥
帝遂發怒削繼貞籍已論四川桃紅壩功復官致仕十
一年用薦起歷兩京尚寶卿尋遷順天府丞超拜兵部
右侍郎兼右僉都御史巡撫天津督薊遼軍餉乃大興
屯田列上經地招佃用水任人薄賦五議白塘葛姑數
十里間田大熟城中地渴鹵相地鑿渠井汲飲無乏舊
制遼餉米豆每歲召買於各州縣餉司葉廷桂多侵牟
繼貞繩以法廷桂結廠衛陰中之會劉應國兵失利詭
言津登兵後期論罷已帝念繼貞不置卽家拜兵部右
其用天下惜之

王夢周字堅吾錫爵從父能文好山水萬曆十九年舉
人選宜興教諭時學政圯甚夢周力爲振頓立思過薄
嚴課諸生士習丕變未踰年卒居鄉雪鬪孝廉婦冤出
族子九人於死獄人高其義

陸端御字履威攻苦力學萬曆七年選貢廷試第一子
文麟字孟祥文鳳字仲鳴俱好學篤行文麟少補諸生
應歲貢讓其友文鳳工詩文及隸書萬曆四十四年歲

貢廷試亦第一

吳樞字龍橋博學能文後生多從受經義性耿介與相國王錫爵友善然未嘗造謁錫爵往往就見之卒年九十一

周鎬字子京墨子弟銑字子明俱工詩文子濂亦工詩蒼然風骨不爲靡麗之辭

闕景陽字伯子攻苦有介性萬曆十九年舉人蕭然授徒不預世事出入踽踽徒步清操終其身

周維翰字申甫諸生湛深經術里中爭延爲師年七十三以歲貢終子綿存早喪母事父孝乙酉遇兵縣存謀

太倉州志

卷十九 人物三

二十四

他徙父不從遂及難

薄澹儒字味元萬曆三十四年舉人贅壻常熟徐氏遂僑居其地所作詩文偏宕有逸致

徐憲卿字九亮萬曆四十一年進士授行人泰昌元年擢南京工科給事中掌計典尋管京營軍務時奄黨用事三案議起憲卿疏論李可灼侍疾不謹宜按祖宗法死無赦天啓四年疏言駕帖之僉北司之拷非所以示天下公宜以罪犯付法司內外章奏還內閣職掌無使輔臣失職言皆侵權璫已又特疏糾忠賢客氏及其所用要人奸黨側目時緹騎四出在籍者先後逮獄或說

以委蛇解禍憲卿不爲動忠賢死進添註南京光祿寺少卿陞太僕寺少卿駐滁州視江南北馬政土寇大至率民兵登陴寇不能攻又五年以病歸甲申聞國變時時慟哭而卒年八十二

黃元會字經甫幼孤感奮爲學與同郡姚希孟齊名萬曆四十一年進士授工部都水司主事管窑器廠光宗在儲位宮監傳諭索器皿折價元會抗言曰非所以光潛德也不與攝大木廠因殿工立註銷積高法中人不
能私督夏陽閘工省帑數千兩事竣擢南昌知府廉佐令之貪橫者黜之宗室驕恣一裁以法削其冒封二人

省厨傳之擾庇死難武臣之子陞按察司副使主驛傳視卒罪重輕定爲三等供役法轉提學副使益藩以清道撻士士譁王疏聞元會調護得薄罰會鄉試迫以百餘日畢十三郡試勞勩成疾轉山東布政司參政撫按請留仍改江西按察使疾作乞歸卒年五十一元會喜黃老家言神識清遠不屑詭隨亦不皎皎異故終身不受牽於門戶焉

吳嘉祐字世德萬曆二十五年舉人授大名通判捕宿盜振水災築黃隄攝濬縣事政尚清簡興文教拔雋才以忤僚友乞休歸嘉祐性愷弟每傾囊應人緩急嘗輸

田百畝助贍貧士知州勒碑紀其事

李鳳毛字起元本姓毛歲貢生仕至通判父歿時同兩弟已析產父有婢姪鳳毛請母持護既生弟遇躬教誨爲諸生已并兩弟產四析爲營宅成婚遇每述感泣

沈志仁字景範諸生父尙文充松潘總兵官播酋反諸軍會援督府坐尙文逗留論斬志仁徒跣隨父獄號泣長安街遇冠蓋輒叩頭訴會秋盡論報志仁詣廷尉乞上父冤狀不得乃手血疏擊登聞鼓上之忽旨下刑部釋尙文志仁卒奉其父以歸

顧敏功字起凡以例仕廣西貴縣丞弟敏志卒於武隆

太倉州志

卷十九 人物三

二十六

樞滯荊州敏功年老欲往迎家人止之敏功泣曰吾兄弟五人總先人一塊肉耳忍令其骸棄千里外乎立戒塗抵荆而卒荊州守義之撥舟護兩樞歸敏志官武隆典史楊應龍亂改任游擊嘗平賊有功

顧敏學字宇凡以例任甯州判官有弟敏義遠出敏學勸之歸曰爾無業耶吾有薄田可分爾無居耶吾爲築

室敏義賴以成家

王昶按敏功傳舊有兄弟五人之語是敏學敏義必皆其兄弟然次序無

考姑附於此

金瓚西城人鄉校老師有兄貧鄰家失火瓚升屋顛天願焚吾廬無及兄須臾風轉火滅年九十餘終

陳于陶字味淡居沙溪諸生親喪三年不離苦次從孫
義年十二親疾刲股死侍御蘇鄴紀其事

曹大憲字章甫與弟陽和同爲諸生陽和卒值同學生
緣事當議罪思委陽和以自脫大憲奮然曰豈可以吾
弟死令蒙不韙名出爭之事得白

姚廷法字省吾居雙鳳父晚生幼子欲不舉廷法力請
再三令妻王乳之卒教養成立

朱應聘字敬逸母毛病心痛應聘侍疾五十晝夜思剗
肝以療密持刀刲右脇腸出絕於地兄驚急召醫納腸
藥敷之觀者如堵有青衣嫗言曰曷不取拭血布煎湯

太倉州志

卷十九 人物三

二十七

飲母乎如其言病愈又八年母卒廬居三載

曹子念名昌先以字行更字以新應諸生試不售棄去
習古文辭爲其舅王世貞所重海內人士登瑯琊門非
子念介弗進也世貞兄弟歿子念意不自得遷蘇州卒
無子

沈承字君烈諸生少負雋才工詩賦爲古文奇奧峭拔
森然有芒性閒澹未嘗干謁又絕寡言無臧否人亦習
之未四十卒里人立廟祀之

陸望字武賢早失怙出贅不得侍母因號憶齋以見志
婦翁無子撫族子爲後望躬任喪葬又爲所後子償逋

賦生平重義好施能濟急難

周敏成字政甫萬曆四十六年舉人以兵事受知於大學士孫承宗巡撫方一藻辟贊軍務會以事牽連被逮久之獄解參軍事如故國變後謝絕世務究心釋典卒年七十三

吳震元字長卿萬曆四十年舉人天啓二年授灤州知州旋補德定通判時方追熊廷弼楊漣資產震元力庇之且分俸周其家七年陞衡州府同知改漳州黃道周少所許可獨喜震元每與揚挖經史講說易象必達旦崇禎五年海賊劉香入犯檄震元守石美以計擒之六年春紅賊亂震元守銅山力戰大破之丁父憂歸杜門著述周延儒強之出不應十五年卒

許國榮字允尊二歲喪父家極貧母朱氏育之天啓五年成進士授太常博士遷工科給事中時太監掌廠事邏卒訶刺中外目懾又張爨憲總督戶工兩部陵部曹國榮上疏極論觸爨憲恨會外解鉛至國榮監收固中額中人報闕少激帝怒褫職後事白起補應天府照磨量移光祿寺署丞病卒國榮在諫垣章數十上論復大甯救罪謫諸臣尤中事要事母至孝母性嚴少不如指卽詬責國榮長跪請母色霽方起以爲常與人交有本

末周恤親黨多待以舉火者

吳升元字仲超奇敏強記通古今兼精歷學每預刻交食差度無誤者爲人沈默寡言負一意終歲隱几讀書足不他及家貧取與極明或絕糧忍飢自如以歲貢選無錫訓導歿

朱明鎬字昭芑父廷璋官至參將明鎬年十七補諸生性強記天資絕人張溥及張采讀其文願與之交明鎬每讀一書手自勘讐朱黃鉤貫條分縷析上下千百年若指諸掌家貧資束脯奉母撫幼弟成立與人交推誠任素遇義所不可則正色譙讓無少避卒年四十六

太倉州志

卷十九 人物三

二十九

錢煖字叔弢桓子諸生性友愛敦睦宗族嘗置義田三百畝以贍族人子陞字臣宸亦諸生兄給事中增歿撫其子廷銳如巳子父歿遺券可萬金謂諸昆弟曰我家所不足者非財也焚之族人貧不能葬倡爲廣孝阡瘞棺無數邑大饑傾資煑粥以振獲全甚眾歲旱從知州步禱致疾卒年七十八

徐樹聲字文岳萬歷末遼事急樹聲以布衣謁將軍李如松留幕五年如松死孫承宗駐廣甯樹聲復詣軍門獻策承宗悅之使隸監軍袁崇煥天啓七年甯遠之戰遣樹聲奏捷崇煥進遼撫授樹聲游擊崇煥死孫元化

爲巡撫擢旅順島參將元化遣孔有德等援遼道新城作亂據登州樹聲聞報馳救半渡颶風大作軍艘覆溺者半轉募赴敵戰於登州之西關力屈被執不食死王時敏字遜之衡子以祖蔭授尚寶丞奉使齊豫楚閩藩封天啓四年陞正卿丁母憂服闋遷太常寺少卿仍筦尚寶事又五年謝病歸當爲丞時刊神宗諭筆及祖錫爵揭藁流布遠近東朝定策心事乃白家居飭內行著家訓勗諸子讀書砥行維持善類獎掖英髦以其身繫鄉黨重者四十年性通達工詩文尤善書畫畫師黃公望分隸師魏受禪碑參用夏承碑法寸縑丈幅海內

珍之卒年八十九子九人持字平宰扶字匡令貢生餘自有傳

陶鎔字汝陶以歲貢授宜興訓導陞杭州教授不赴性至孝舉動方嚴喪葬享祀一循家禮居鄉執經者滿戶一以躬行爲訓嘗謂其子曰汝父無他長惟不談人過不遂已非衣謝文綺食不厭藜藿財無苟得色無邪視而已卒年八十五

張鳳翼字伯鳴諸生幼奇慧讀書不事章句事親孝與弟友愛終身不析產時議浚鹽鐵河久不決鳳翼慷慨陳形便謂嘉定主其役太倉佐之貼工費銀二百有奇

眾皆服遂刻石爲例家故貧遇人危急竭力以濟卒年六十

顧燕詒字安彥其先滁人崇禎元年進士授刑部主事出守濟南蠲除苛政歷五載擢福建驛傳道以平賊功調嘉湖兵備時浙西爲盜藪燕詒至則完城郭蒐卒伍儲芻茭有保民四事書值嘉善漕卒變燕詒輕騎往諭指顧懾服又興築海塘保障二郡進按察使陞右布政使先是吳昌時官文選司郎中倚勢張甚燕詒拒弗與通昌時銜之誣劾燕詒奪職歲餘昌時死東市燕詒復官入國朝有欲薦燕詒者以疾辭知州白登明禮婁太倉州志

卷十九 人物三

三十一

東七老燕詒居首康熙六年卒年八十五子景錫進士光復副貢生

王燾字濬仲秩元孫少孤貧九歲出後從父族人有謀其產者產且鉅萬燾悉以讓獨迎養所後祖母及母惟謹萬歷四十六年舉於鄉授海門教諭謝革贄儀後補儀真邑令墨絕弗與通嘗會試路資絕商人江慕燾清節進百金謝弗受薦陞解州知州未任丁祖母憂服除補隨州州經羣盜焚掠戶不滿千燾至增城垣練軍實賊易隨縱騎過燾督民兵擊斬三百餘人賊憤悉眾圍城守二十日引去崇禎十年賊大至守將王大用遁關

廂失守燾猶晝夜乘城手殺賊偵會天大風雪西城火裂燾知事敗馳入署整冠帶自縊賊焚州治所縊室獨存屍植立不仆賊望見駭走既所司察狀覓州印印出燾所立尺土下踰年子錫中疏請贈卹未報福王時謚烈愍 國朝謚節愍

張采字受先鳳翼子崇禎元年進士父早卒事母至孝弱冠益折節讀書時海內學者喜誦諸子書爲文多詭異同里張溥與采相砥礪期以六經史漢倡天下已先後成進士世遂翕然服從采謁選歸病里中顯者多縱恣乃集薦紳於城隍廟而誓曰吾儕讀古人書幸通籍

毋以勢凌人毋縱奴僕橫毋使宗鄰子弟肆里門毋聽私屬隸官府有渝約者共斥之眾曰諾風俗始少戢及授臨川知縣敦儉約奉母間進肉妻子以下率烹葵食之恤民繩暴善政畢舉尋移疾歸先是張溥舉復社采歸與其事爲陸文聲周之夔所訐及溥卒采獨具疏直之事詳溥傳十四年旱蝗采請於州四門設粥廠活萬人又作常平倉立鄉約及保甲法知州錢肅樂尤重采民有不便采白之無不從豪猾銜之刺骨福王時起禮部主事陞員外郎已奉使歸采好善嫉惡出於天性修輯州志皆直筆嘗過紹興與劉宗周講學宗周極推之

瀕行封黃柑四枚馳數十里爲贈尤留心經濟嘗與程
珣定海亂乙酉里中巨猾數十輩給采出捶之幾死一
僧伺間負之走得脫自後東西竄伏輒南向痛哭三載
卒年五十三

張溥字天如父翼之性長厚喜施與嘗脫富人許某於
死贖鄰人朱某於奴溥幼嗜學所讀書必手鈔鈔已朗
誦一過卽焚之又鈔如是者六七始已後名讀書之齋
曰七錄以此與同里張采共學號婁東二張崇禎元年
以選貢入都采方成進士兩人名徹都下已采官臨川
溥歸集郡中名士相與復古學號復社以繼東林四年

成進士改度吉士以葬親乞假歸讀書若經生日有常
程每侍史繕錄口占手注六七輩不給四方人士翕然
歸之以不及其門爲恥所品題甲乙頗能爲榮辱溫體
仁惡之里人陸文聲者輸資爲監生求入社不許因詣
闕言風俗之弊皆原於士子溥采爲主盟倡復社亂天
下下所司問狀提學倪元珙兵備馮元颺力言諸生誦
服聖賢引徒講學實非黨有旨降謫繼任者山東元璋
張鳳翽遷延久之閩人周之夔嘗爲蘇州推官坐事罷
疑溥爲之聞文聲訐溥遂言溥等把持計典已罷職實
其所爲因及復社恣橫狀章下巡撫張國維等國維言

之夔去官無預溥事

審按倪疏在陸訐告後張疏在之夔赴闕訐溥後倪後學臣爲元璋

張鳳翽二人均不覆故有之夔訐告之事舊志叙次失先後今移改

十四年溥已卒事猶

未竟刑部侍郎蔡奕琛坐黨薛國觀繫獄未知溥卒也
訐溥遙握朝柄已罪由溥因言采結黨亂政詔責回奏
采上言復社非臣事然臣與溥生相淬厲死避網羅負
義圖全誼不出此念溥日夜解經論文矢心報稱曾未
一日服官懷忠入地卽今嚴旨之下并不得泣血自明
良足哀悼時體仁已罷而周延儒當國溥座主也故采
疏上事卽解明年御史劉熙祚給事中姜琛交章言溥
砥行博聞所纂述經史有功聖學宜取備乙夜觀因薦

太倉州志

卷十九 人物三

三十四

采學行帝御講筵問及二人延儒曰讀書好秀才帝曰
溥已卒采小臣言官何爲薦之延儒對曰二人好讀書
能文章言官爲舉子時讀其文又以其用未竟故惜之
耳帝頷之遂有詔徵溥遺書有司先後錄上三千餘卷
帝悉留覽溥性忠孝事母極婉順談朝廷事輒欲有所
澄清與朋友周篤聞正人患難如身受卒年止四十門
人私謚曰仁學先生

鄭嘉謨字伯明世襲太倉衛指揮天啓四年移浙江備
倭先是兵譟殺掠無禁嘉謨至誅其首亂眾始帖然擢
福建撫標游擊值紅夷要挾互市巡撫南居益令嘉謨

會勘澎湖破走之尋授廣東潮州參將程鄉平遠銅鼓山諸穴巨寇聚眾各數萬悉撫降之海寇李魁奇郭芝葵旣撫復叛焚掠四出圍柘林塞嘉謨率騎兵馳援殲其前鋒圍解叙功晉漳潮總兵未任卒嘉謨敦內行事大母母以孝稱

李正春字孟芳崇禎元年進士授侯官知縣忤司理王凝命以事齟齬降江西布政司檢校署饒州司理九江道王思任器其能題補德化縣歲大稔米貴正春坐江關客有載粟來者止之平價以糴復煮粥散給鄉城多所全活會蠲賦正春取戶籍親自分別檢校吏胥無敢

上下手德化當孔道士大夫遊廬山率取官值給役民苦擾正春悉取竹輿焚之立石以禁熊文燦爲總督愛正春才而有守文燦討賊意主撫正春陳戰守方畧力言撫非計及文燦敗解學龍爲巡撫惡文燦并及正春正春遂謝病歸一月卒祀德化名宦

凌必正字聖功雲翼孫崇禎四年進士授戶部主事出爲建昌知府忤上官意左遷真定同知旋署府事陞廣西兵備按察副使潔已惠下士民戴之十七年歸屏跡荒野與華乾龍陳瑚講學論古終其身必正性耿介善屬文兼工楷法精繪事卒年六十三

錢增字哀卿煖子崇禎四年進士授行人奉勅封藩屏
絕餽遺擢兵科給事中轉刑科都給事讜直敢言嘗劾
楊嗣昌悞國狀年四十二乞養歸里居請開濬劉河條
列八事已議行值國變未果後知州白登明大開劉河
悉宗其說 國朝順治九年撫按交章薦以母老辭
吳克孝字人撫弱冠爲諸生家貧有富人饋粟十鍾郤
不受李繼貞器之崇禎三年鄉試吳江知縣熊開元拔
冠其房十年成進士母憂服闋除刑部主事進員外郎
備兵保定以目眚去職十七年薦補嘉湖道僉事其在
刑曹恤刑粵東平反滯獄至千二百餘人比報政會開

元下獄奉密旨卽訊取死狀以聞克孝夜半詣金吾請
寬旦夕卒以營護得遣戍在保定境內殘破盜賊晝掠
郡縣日選丁壯乘城克孝至盡撤之而密擒渠魁秦鳳
吾等斬以徇抗疏言闖賊披猖方今所憂不獨關陝洛
陽宜宿重兵韓趙以壯神京右臂當國惡其直報罷克
孝乃曰爲補苴計峙糗糧繕城隍復險隘墾荒土萬餘
頃易州礦使橫克孝笞其卒而直陳礦使諸不法當國
欲罪以擅責禁校尚書鄭三俊救之得免在嘉湖募健
勇練水師擒盜黃文魁姚二等斃之桀盜葉六集黨千
餘劫官鞘郡縣莫敢詰又斗張三者驍勇過於葉俱捕

以正法監軍太監高某擁潰師抄暴克孝嚴兵待之某引遁克孝搢梧彌瘁目眚益劇遂告歸嘉湖人遮道泣送至有赴水挽舟而沒者三人 國朝初華亭陳子龍亡命吏疑克孝素與善匿之被逮未至而事解性好義急桑梓利害罄資弗惜也卒之日貨錢買棺以殮年八十一

胡周鼐字其章崇禎十三年進士授刑科給事中立朝數月封章十餘上嬰權貴忌罷職歸明年復起以親老辭鼎革後會海警知州李作楹用其策城守邑中安堵有 詔直省大吏起在籍縉紳周鼐卒辭不赴

王芳字尚義嘗訪友小直沽適慈谿費廷槐病卧旅舍與語歎曰奇士胡自困移至寓具藥餌將護倍至明春同還次呂城病卒目不瞑芳枕尸於股曰君有四弟兩兒親養有託毋更戚戚費喉間喞然有聲目漸瞑抵虎邱營棺衾以殮并訃其家

王志長字平仲臨亨子志堅弟崇禎十三年會試副榜奉特旨與甲榜同授官感夢而歸絕意仕進志長篤於經學以易起家兼精三禮毛詩皆有成書弟志慶字與遊少從兄學弱冠好詩歌作史論上下古人晨夕手一編有常課天啓七年中鄉試志堅後居吳郡志慶與志

長比居終身相師友無間

顧夢麐字麟士崇禎六年以副貢入太學夢麐嫉當時文風潰決畔違傳註乃獨闡正義著四書說約海內翕然宗之時薦辟令下巡撫張國維欲薦於朝固辭 國初或冒其名謁當路貴人遂被欵接委職至通判夢麐聞之曰我自爲我彼焉能浼我哉竟不發其事人推爲長者

趙學基字六息諸生兄弟六人竝知名學基尤精史學明季亂憂時怫鬱見之著述許旭稱爲吳中高士性不諧俗嘗挈家居寒山尋歸卒

太倉州志

卷十九 人物三

三十八

張泳字幼濤翼之子幼有才名無錫馬世奇隨父希尹任訓導至州重泳與交貢入國學期滿授布政司理問遷宗人府經歷值弟溥以復社被糾乃歸崇禎九年舉賢良方正不就泳爲文少喜恢博後修經術明水利嘗獨力濬鹽鐵塘

張灝字夷令輔之子築學山園縱情詩酒四方名人畢集好篆刻選子史成語成學山堂印譜八卷多出名人手侍史何通與焉通字不違著有印史五卷行世

張深字徹侯輔之子以蔭入太學崇禎年間兩中副榜甲申後棄儒服閉戶讀書人罕見其面兼精楷法工淡

墨蘭竹年七十八卒

費參字省公性孝友家貧老屋三五椽日光穿漏風雨不蔽有田數畝歲澆饘粥不給然耿介絲粟不假於人論者以爲古邠原徐穉之流陳瑚稱其詩律老而益細子來字天來亦工詩

王鑑字圓照世貞曾孫由恩蔭歷部曹出知廉州時粵中盛開採鑑力請上臺得罷二歲歸構室弇園故阨額曰染香年甫強仕屏絕聲色不異老僧畫法巨然入神品年八十卒遺命以黃冠道衣殮云

黃翼聖字子羽元勳子少雋異秀絕人表崇禎十一年

太倉州志

卷十九 人物三

三十九

以薦授四川新都知縣時賊躡楚蜀新都素殘破聞賊至爭走匿翼聖積薪縣門誓死守城得全陞安吉知州尋棄官歸性蕭閒喜山水工五言詩人稱如么絃哀玉自有天韻郡人徐波刻其遺集孫侃字孝直諸生

陳申錫字君渥居張涇性端嚴言笑不苟博極羣書尤精易理自謂得邵堯夫真傳

陳朝典字徵五以教授重鄉里學者稱温如先生鼎革後同子瑚隱蔚村作一二小詩好談古來高人獨行鄰里化之輒遣子弟就學其有小小勃谿諍語搖手面赤曰恐陳先生父子知也年七十餘卒

王璣字璿伯性孝嘗刲肱已父疾崇禎十三年武進士授柘林守備歷遷淮南副總兵駐淮西移守劉陽王師徇劉河璣與同年生上海黃日章率眾拒戰眾寡不敵日章歿於陳璣中數矢存八人肩背相倚揮矛擊飛矢有聲統帥奇其勇欲生致之執其父母爲招璣間行竊負以免生平自厲名節易代之際嘗以死牖下爲憾未幾結轡成疾卒年四十三

王日新字鑑明諸生教授弟子有程法遭世亂絕意科舉肆力於天文地理之學甲申後遯跡荒野卒年五十四

王儀字異人諸生讀書植行家壁立自守泊如當事者高其行或遺以金不顧居城南數椽不蔽風雨詠詩自娛甲申後棄儒冠放跡頭陀自號樂道人

趙自新字我完崇禎十二年舉人乙酉詣州守請給僧牒微服出行祝髮松江會龍菴旋隱嘉定封家村既有謝姓者告以應舟山之招自新謝之及事洩逮至松江絕食數日不死復械至江甯時主讞者爲洪承疇自新昂首前對曰公爲新朝佐命身爲故國遺民豈嘗須臾忘死哉顧有其志無其事徒負虛名竊用爲愧復鞠謝姓者卒無實釋歸旬日卒年五十三臨沒謂其子曰吾

生無益於世歿後題墓石曰明鄉進士憤道僧趙某願足矣自新面目嚴冷人望而畏之著作甚多陳瑚陸世儀皆其弟子

華乾龍字天御崇禎十二年舉人居父母喪不處內不茹葷酒甲申後遜居荒野謝絕人事睢州湯斌撫吳延主講席以疾辭乾龍於學無不闕而未嘗以文章名生平主洛閩之學言動必以禮而未嘗聚徒講學招引聲氣年垂八十教授自給卒門人私謚安止先生

陳瑚字言夏朝典子崇禎十五年舉人少通五經凡天官河渠兵農禮樂以及壬奇等書無不貫串與陸世儀

江士韶盛敬相齟切世所稱四先生者也鼎革後避地崑山蔚村躬耕以養村田沮洳瑚導鄉人築岸禦水歲獲豐穰又與陳說孝弟及爲善三約遠近向風遊其門者多俊偉之士冬月常衣單袂客有重裘者欲解以贈竟席不敢言 國朝詔舉隱逸知州白登明將以其名上力辭卒年六十三門人私謚曰安道先生蔚村人立祠祀之巡撫湯斌卽其故居爲立安道書院

陸世儀字道威諸生天資英邁弱冠志聖賢之學謂孔子之後有真儒周公以下無善治其學以居敬窮理爲本而推極於體國經野凡天官地理禮樂河渠以至用

兵行陣之法口區手畫燦若列眉窮居授徒隱然負開濟之重鼎革後絕意科舉體驗益精著述益富後嘗講學於錫山東林書院說易於毘陵大儒祠設教於雲陽黃塘聞風親炙者皆感動奮發卒年六十一門人私謚尊道先生亦曰文潛先生 國朝同治十三年州人士籲大吏請於 朝得 旨從祀 文廟

江士韶字虞九有源曾孫弱冠爲諸生與陸世儀諸人講程朱之學同時理學諸儒多著述士韶以爲三代聖賢之旨盡於昔儒之論說惟在躬行而已晚年取平生所作聚而焚之故不傳於後云

盛敬字聖傳諸生家貧處之泊如矢志存誠主敬之學鼎革後教授寒溪上以成就後學爲事平生篤於孝友居喪盡哀三年不飲酒食肉有弟遇之無禮敬終始怡怡年七十六卒遺訓凡浮屠誕妄之說概勿用門人私謚貞介先生

郁法字儀臣諸生聞陸世儀諸人講程朱之學慨然慕之家有樓曰靜觀宏敞爽塏迎州學正文祖堯講學其中會者常數十人曹煒曹鈞錢墀夏有光之屬咸與焉煒字暉吉從文祖堯熊開元論學有得性孝友與人交無町畦誘善規過人人以爲親已鈞字尊素幼失父母

事度母惟謹與陳瑚陸世儀江士韶諸人遊誼甚篤嘗風雪中念士韶貧病呼舟攜錢往贈順治九年歲大饑民困徵輸鈔赴淮上陳分年帶徵之議臺使者如議奏准困得甦劉河塞與顧璉條浚之墾字人衷桓孫與江士韶相齟切所學亦精詣有光字玉汝以武舉爲閣部史可法標將揚州破退隱巴湖與陳瑚陸世儀等講學見淮雲問答

王育字子春家貧好學於書靡所不覽嘗元旦筮易得復之初九次年元旦復筮得之育曰天教我學顏氏之學也遂與陸世儀陳瑚諸人講學積力深思幾進於道

居家擯絕異端喪葬悉從古禮 國朝舉山林隱逸辭不應卒年八十八易簣前一日猶與友人講易如平時於五經皆有著述又嘗以六書之學失傳乃推古聖賢造字之本根於六義證以五經積十餘年成三十萬餘言旁通岐黃之術其剖析多奇秘云

龔挺字無競諸生博學善古文辭弟掞工詩饒晉魏風格拱篤學孝弟皆與顧夢鷹陳瑚陸世儀友善

王化中字孟成嘉定籍諸生博通經史尤精性理

曹耀字德公少從張溥楊廷樞遊嘗與陳瑚輩講天人性命之學至老不衰

吳爰字修齡贅壻崑山補諸生被斥嘗取義山無題詩
詳說其意爲西崑發微又據吳偉業綏寇紀畧爲撫膺
錄晚年事佛兼好神仙聞江淮有異人往從之學爐火
術旋自悔著有他石錄年八十五卒

顧振字子厚父韓病急振年十五醫禱不効念古有割
肝救親者籲天引刀自吭以下劃至腹卒不得肝乃剖
臂肉治糜進病愈創處俱癍痕墳起知州錢肅樂給額
以旌

唐懋勳字昭甫居雙鳳父疾篤斷指煮羹進愈州守旌
其閭婦翁周文起無子割修脯所積爲置田立後

太倉州志

卷十九 人物三

四十四

王國瑜字子握父歿鄰火延及殯舍國瑜躍入伏柩慟
哭守與俱燼火忽滅平生繩幅自持燕居無惰容卒年
五十七

呂縉字子方父源明官原武知縣有禦寇功歿於任縉
聞訃偕僕李長徒行三千里時歲荒寇亂沿途冒險屢
瀕於死卒扶櫬歸葬有日記詳其事

呂雲奇字石英少具至性讀書至忠孝節義事輒反覆
不置少喪母父嬖妾虐使雲奇益起孝敬父感悟順治
二年 大兵至父匿叢棘中父受縛雲奇躍出乞命不
聽皆殺之家人求得其屍猶見兩手抱父甚固云

呂雲孚字石香乙酉閏六月從吳江吳易舉義兵敗遁歸 大兵至奉母守舍不去死之雲孚幼爲張溥所稱許熊開元令吳江試以文奇之遂補吳江諸生云
王時重字威若 大兵至時重年十八隨父瑛避兵瑛就擒將加刃時重亟前求代竟與父俱死
江德璜字獻之諸生母年八十目盲德璜日舐之冀復明母病痢衣必手滌貧無以供恒鬻婦簪珥以養得佳味輒喜不計值也子士顏 大兵下隨父匿後園父被執士顏出求免遂父子俱死

顧泳字爾儔工書業醫母亡父老泳先意承志妻金事

太倉州志

卷十九 人物三

四十五

其翁如泳人稱雙孝

王之璧字拱先諸生父晚年有妾生子謀他育之璧諫止給之衣食後得成立

呂一鳴字梅庵諸生弟一鶚亦諸生夫婦俱夭遺孤振元未期歲一鳴撫如己子教養成立

穆雲桂字苑先從張溥遊黨禍熾同社生往往從決策多所挽救後溥弟王治以給諫改官甫旋里踉蹌就逮禍不測雲桂先期北發傾身營護得削籍歸而雲桂幾爲忌者所中平生周旋故舊於患難死生之際獨盡心力三十年如一日

張起芳字伯榮父文竹由常熟遷太倉少好讀書家貧去而服賈值凶歲傾困以給貧族里有逋公賦者出資濟之尤精於醫子世昌亦以醫名

宋龍字子猶崇明人諸生避地太倉與陸世儀陳瑚等十人爲友其學淹貫經史而歸於踐履篤實嘗扁舟入富春山慟哭謝皋羽鼎革後隱於醫僧服終其身

陸羲賓字鴻逸能詩兼精奇壬有智畧陸世儀亟稱之與陳瑚避地蔚村晚築春星草堂於城西一時名人皆樂與之游

袁臨字孝宜弟賁字幼白同爲諸生父嶽以諸生遊京

太倉州志

卷十九 人物三

四十六

師有節概臨賁尤負才氣不可一世張溥舉復社奔走名士所不能致者二袁而已甲申後臨耕海濱賁薙髮入山稱龍蔭大師

王瀚字原達雙鳳人諸生有至性執父喪哀毀過禮甲申後祝髮隱於浮屠徙居廬山改名戒顯字願雲能詩文工書法

郭士髦字斯士居劉河諸生甲申之變欲自沈池水念父老不果終身遁跡罕入城市侍父疾七年孝謹如一日年六十五卒弟澥字人一從士髦學後棄儒冠隱海濱同時張元治字在田亦以諸生放廢終其身

張于允字晉三采從子鼎革後徙崑山依鄉塾以遯跡後避地唐墅焚劫四起僦小舟避覆水死

顧鉞字雅儔蘇州府諸生讀書有原委重名節素志高尚不苟去就喪祭多循古禮幼喪父母與季弟鑰甚相友愛

陶鴻祚字裔昌鎔子居直塘少讀書尊儒術斥二氏嘗悲憤時事痛哭荒江蕭寺間著英雄淚二十卷所與交者學正文祖堯及州人王育盛敬華乾龍袁賁陳瑚及其甥顧鉞數人而已

毛雲漢字子五諸生究心三禮鼎革時與弟霄漢避兵

太倉州志

卷十九 人物三

四十七

璜涇亂定還城杜門不出晚精禪學霄漢亦諸生性廉靜能詩文

王挺字周臣時敏長子諸生與陸世儀陳瑚諸人相師友以蔭授中書舍人在官七月疏請破格用人奉使兩浙卻饋遺不宿官舍不赴公宴復命卽告歸入國朝杜門卻軌舉賢才不就晚年廢目日使家童誦書以聽爲文口占使書之名其稿爲不盲集卒年五十九

陸世榆字襄虞諸生攻苦力學鼎革後委棄舉業或歌或哭人莫測也當事物色之以疾辭卒年六十餘
陸發字濬初諸生有文行鼎革時年未壯杜門高尚水

亭竹圃嘯咏其間嘗於危難中扶植孤寡士林多之
周西臣字倣文性孤峭少習舉子業幽微峭厲亦能詩
鼎革後躬耕以老

沈雲祚字予凌弱冠隨其父謁高攀龍於東林得主敬
之學崇禎十三年成進士授華陽知縣獄囚秦纘勲者
爲徭黃賊耳目殺獄卒逸雲祚潛告其族人石柱土司
秦良玉俄械之至吏驚爲神十七年正月張獻忠破夔
州成都大震雲祚見蜀王陳守禦策不納聞內江王至
淥賢以言激之至淥心動告王王終以祖制辭五月賊
陷重慶燒劫數百里旋薄城下雲祚偕僚屬慷慨誓死
守巡撫龍文光決郫江大堰注錦江以益壕水甫至城
已破賊執雲祚幽大慈寺饋以食雲祚躍起大罵指其
口曰我有口食賊肉耳豈食賊粟哉遂遇害 國朝賜
謚忠烈幼子荀蔚方五歲友人預匿之山中得脫越二
十年始歸作蜀難叙畧上之史館

吳繼善字志衍崇禎十年進士爲人博學辨智書一覽
輒記文體古麗取法漢魏名稍亞於張溥謁選得成都
知縣蜀事棘啟蜀王發帑金備寇不應張獻忠破成都
一門三十六口俱遇害其弟事衍得脫歸始知其詳僕
五郎者已免奮然曰主死吾安得獨生亦死之

畬按吳
偉業傳

云張獻忠破成都被執罵不絕口賊鬻而割之一門四十餘口皆遇害彭遵泗蜀碧所載亦同而吳鹿樵紀聞云繼善降賊授偽官一日為賊寫祭天文其紙中接賊見之怒曰若不欲我一統乎立剛之與傳互異沈荀蔚蜀難叙畧亦載繼善為偽禮部被殺四庫全書館總裁等議覆左都御史張若淮條奏內稱繼善降賊被殺疑本是書因竝紀於此

季曾貫字恕先諸生吳繼善延赴成都幕獻賊陷成都繼善闔門遇害賊解曾貫縛命作郊天文不屈賊燔之骸骨為灰燼時又有黃錫侯同在幕亦被害

王會華字元升在晉子諸生乙酉 大兵下蘇州鄉老會於明倫堂為納欵計會華垂首不答歸七日不食死王湛字德嚴諸生 大兵定蘇州留將張天福孟全勝

太倉州志

卷十九 人物三

以重兵駐太倉鄉兵起湛與兄淳部署其眾率雙鳳千人至北門 大兵擊之兄弟皆死淳字美升里居教授

素有士行

畬按王昶志忠節類王湛前列王祈考湯修業憚日初傳金壇王祈聚眾復建寧城陷力

戰死惲敬遜庵家傳同鎮洋縣志及太倉瑯琊太原黎陽三王氏家譜亦無王祈其人且縣志成於乾隆初年去明季未遠豈有遺漏之理疑州志承勝朝殉節諸臣錄而誤今刪

蘇應昌字際之衛百戶中武舉授潁州守備拒卻流賊告歸居南城 大兵至走密室自經兩子解之會鄉兵攻城應昌欲內應張帥獲之面鞫不屈曰殺則殺耳特不受叛逆名遂受刃長子願代死張義而釋之張陽豫字孟和歲貢生授金壇訓導後遷崑山 大兵

圍城陽豫登陴拒守與其子執黃旗麾軍城破死之
郎星緯字元翊諸生少穎異美丰姿爲文工儷體素以
忠義自矢甲申之變星緯憤朝士有從賊者草檄致討
文出四方競傳之 大兵至閉戶慟哭會新令下不從
走沙溪卒就死年三十餘

尙子升就婚崑山沈氏家馬鞍山下 大兵下崑山謂
其妻曰我必死矣汝亦不可辱妻曰諾乃先縊其子次
縊其妻懷練出自縊於山巔佛閣

顧徵甫湯四竝鄉民 大兵駐州城二人率直塘鎮民
由北關入與戰被執皆磔死

金鴻按直水志顧兆行字貞孚明末武舉此作徵甫

太倉州志

卷十九 人物三

五十

字音相近
未知孰是

王國璠字露玉諸生 大兵駐州城率沙溪民由北關
入眾潰死之

顧士璉字殷重諸生練達時務劉河淤三吳連困於水
當事議浚以費繁而阻知州白登明用銷圩法先疏朱
涇繼疏劉河用士璉議也後吳中潦大吏復議疏劉河
延士璉問策士璉請仿海瑞折漕例約以四萬兩浚淤
段五千丈建閘天妃鎮以利蓄泄從之先是崇禎甲申
秋大旱米價騰貴民無以完漕士璉與陸世儀江士韶
曹鈞王發祥何甯國等走南都請折州民釀千金爲費

既得請費悉散還之平生講求實學尤以澤物爲已任
拯難濟急有國士風卒年八十四

陳三錫字紹咸洽九世孫通經史負幹濟才時州郡徵
輸責成總甲輪者至破家三錫請於當事獲免甲申後
隱居不入城市卒年七十三

袁嶽字五遊幼歧嶷髻齡時見巫媪祀竈者及其名遽
前披其頰曰吾名豈若所宜呼識者奇之稍長能文師
事同里李繼貞繼貞亟稱之乙酉後偕子臨賁棄諸生
居海陬負杖隴頭若忘斯世閱十六年卒門人私謚曰

靖安先生

據王煒靖安先生傳增

太倉州志

卷十九

人物三

五十一